

編號 1 號

【生趣个童年】黃美貞原作

還細時節，細人仔無科技產品好搞，該時，屋簷下、杌仔樹、伯公下、大圳溝、竹林，做下都係佢兜个遊戲場所。

佢四姊妹，還過隔壁鄰舍个細姪仔，長下湊等份家啦、打紙擲仔<sup>1</sup>摺搞園人尋等等，係堵著毋使讀書个下晝頭，定著搞到斷烏，等到大人擎等竹修仔來尋細人仔，大家看著毋像勢正溜瀉。

係好天好時，佢這兜乜好在圳溝肚覓蜆仔。有一擺，沙鼻个老弟麥麥滾<sup>2</sup>，打賭佢捉得著細蝦公，上屋个阿賢好擲擲仔應：「該愛仰般賭？」老弟誚難<sup>3</sup>佢：「你係捉比佢較多，暗晡夜佢請你食夜。」阿賢堪毋得人激，應講：「好！無問題！」該下晝，佢兜先攔水窟，想摺蝦公錫到水窟肚，毋過，細蝦公哪有恁該捉，兩下半蝦公就躍走咧，佢這兜試著無意思，早就走淨淨。無想著佢兩儕毋認輸，目珠眨都無眨，搥到歸身潦潦、局局糟糟合泥了了，水窟肚斯兩、三尾細魚仔定定，等到斷烏咧，暗摸胥疏，正遽遽轉屋，管佢麼人輸贏？係還毋轉屋，毋單淨無飯好

食，還會賺一身皮肉痛。

又有一日，翕燒个下晝頭，佢兜兄弟姊妹在屋下四圍搞園人尋。老弟係搞頭王，哪位都尋得著來園，搞幾下輪乜搞毋會煞。無想著坐在屋簷下个阿婆大聲喊：「遽遽轉來！毋好在該頭牛眼樹下搞，該位盡多草鞋嫲<sup>4</sup>哦！」頭擺个細人仔輒常打赤腳搞到毋知晝暗，天天个佢這兜，無摺阿婆个話聽入耳，結果做鬼捉人个老妹突然間看著該生到烏疏疏，有十過公分長个弄毛蟲，對等佢趟等過來，嘎走到尾瀉屎！還「哇——」聲嗽出來。好搞个老弟，興蹠蹠仔行兼去想追該尾草鞋嫲，阿婆煞煞咄講：「你係分佢趟到膻身去，斯會像貓拖糞粑——難啟爪<sup>5</sup>哦！」

「良言莫嫌少，朋友莫嫌多。」還細時節跔等同學伴摺隔壁鄰舍个細姪仔弛崗打陣，滿哪仔都係佢這兜共下行過个腳跡、看過个景色、搞過个生趣事，係佢這兜細人仔當懷念个童年，該兜生趣个回憶摺畫面，永久都會留在佢个腦膈肚。

<sup>1</sup> 紙擲仔：音 zhi' piag er；紙牌，指孩童時期玩的圓形紙牌。

<sup>2</sup> 麥麥滾：音 da' da' gun'；誇言也。

<sup>3</sup> 誚難：音 sau' nad；嘲笑譏刺。

<sup>4</sup> 草鞋嫲：音 co' hai ma；攀附在樹枝上全身長滿毛刺的毒毛蟲。

<sup>5</sup> 啟爪：音 lud zau'；本指爪子脫落，後亦借指人脫離困境或陷阱。

編號 2 號

【拜阿公婆】李雪菱原作

這擺五月節，阿爸帶偌兜歸伙房人去敬阿公婆，有當多牲儀排在神桌頂，算算仔有五、六十戶。叔公講：「係講過年，人又會還較多，戴外背个會轉來，有七、八十戶恁多。」輪著點香个阿亮叔比手畫腳，指揮大家个牲儀排好勢。除了三牲以外，偌兜戴中央伙房个子孫，還會另外準備五碗炒好个齋菜，阿婆摺偌兜講係因為公太食齋，阿公講：「這係五燥五溼。」偌看有柿花、牛眼乾、麻米粿、冬瓜糖、地豆糖，還有炒好个香菇、木米、金簪、筍乾、冬粉這兜，偌心肝肚恤：「到底係公太愛食？還係偌兜好食？」

香燒好，愛等湊酒，大家開始打嘴鼓，該片有伯公講起頭擺戴在伙房，伙房分上析、中央、下析，敬阿公婆个時節有當多人。時代變咧，伙房戴毋落，後生仔搬出去落戶，這下斯伸三、四十戶定，看起來有滴仔冷落，所以過年過節大家愛轉來團圓。

這片个細阿叔講：「頭擺下析个阿木叔，豬欄厝野生一頭杧仔樹，阿葉哥會帶偌兜歸陣細姪仔去摘杧仔來食，係分阿木姪看著，會擎袂齊來追，害偌兜走到尾瀉屎，毋知愛去哪園正好，到

這下想起還會發痴驚。」大家聽著哈哈大笑。你一嘴、偌一句，笑聲滿廳下，實在鬧熱。

這堆叔婆、伯姆企在神桌厝，指等毋知哪家个雞仔，緊阿腦講畜到恁肥，又縳到恁靚。細阿姪分大家看到面紅紅，當歡喜講係佢个。叔婆幹頭摺阿姊講：「你兜旨嫁个細妹仔來看一下，左魚、右肉、雞中央，愛記得！毋好排毋著哦，係無會分人笑。」

另外一片个細後生仔企共下，手町拿等手機，畫過來畫過去，有時交頭接耳講一下，有時問愛仰般下載影片；還有人戴等耳機搖來搖去，一看就知在該聽熱門音樂。外背禾埕町<sup>1</sup>，一大陣細猴仔跔等老弟走上走下、追來追去，毋知搞麼个遊戲？看毋識哦！

阿亮叔喊：「湊酒、湊酒，銀紙愛先散便。」仰恁遽呢？嘴鼓都還旨打煞，全部人跑轉去各家湊酒，一下仔大家就無閒直掣，交手亂串。三到酒過後、斯燒銀紙、打紙炮咧。

鬧鬧熱熱个伙房，一大落嫲<sup>2</sup>个生趣事，永遠都講毋煞，跔等酒香摺紙炮聲傳出來，這係幸福个香，這係幸福个聲！

<sup>1</sup> 禾埕町：音 vo tang nen`；晒穀場上。

<sup>2</sup> 一大落嫲：音 rhid tai<sup>+</sup> lab ma；形容數量很多。